

Vun driweriwer

erscheint auf www.lenauheim.de

monatliche
Erscheinung

Februar 2015

von *Helen Alba*

E Feschtschmaus: Kerbsesupp

Ich war wieder mol in Deitschland. Grad iwer die Winterfeiertäch. Weil die Kiner nit in derselwi Stadt wohne (15 Kilometer ausenaner), war ich mol do, mol dort. Wu ich halt gebraucht gin sin. Mei Tochter hat em erschte Weihnachtstach Gäscht ghat. Sei Freindin Brigitte mit Familie aus Stuttgart ware zum Mittachesse ingelad gewenn. Des heescht: Mutter, Vater un ihre vier Kinner, lauter Buwe. Die vieri hat es Simone, mei Tochter, alli getaaft. Dann ware mir noch unser vier, also insgesamt zehn Persone am Mittachtisch.

Schun phaar Täch vorher hats Simone gsaat: „Mutti, es muss vill gekocht gin, unser Gäscht, die were vill esse. Ich weess des aus Erfahrung“. De Speisezettel war dann abgsproch: Gfillti Aijer als Vorspeis, dann Nudlsupp, gfilltes Kraut, Bradl un Krumbersalat, dernoh Tortn un Mehlspeis. Ihr kennt eich jo denke, was des for e massa Arweit war, bis alles inkaaft un dernoh gekocht un gebackt war. Ich han nor immer denke misse: Mer kann doch nor sovill esse, bis mer satt is. Trotzdem han ich lauter grossi Tippe un Phanne iwergstellt, dass jo genuch zu esse do sin soll.

Dann ware se do. Es Simone hat erscht jede bschenkt, dernoh zu Tisch gebitt. Ich war gspannt wie e alde Reenschirm, ob mei Gekochs Anwert krien werd. Vun de gfillte Aijer is nit vill iwrich geblieb. Die Supp is rumps un stumps ufgess gin. Beim gfillte Kraut han ich nor staune kenne. Gut, die Buwe ware im Wachstumsalter un ich han ne jo es Esse vun Herze vergunn. Un mich an ihrem gute Appetit gfreit. Jetz is e bissl Pause ingeleet gin. Die Buwe hans Simone ganz fescht gedrickt un gepischpert: „Du kannscht satrk gut koche. Danke Simone“!

Die Mutter, also es Brigitte, hat verzählt, dass es schwer zurecht kummt mit Arweitsplatz, Haushalt un de Kiner: „Gischter, am Heiliche Owet, do hats bei uns e schmackhafti Kerbsesupp gin. Zu meh han ich ke Zeit ghat. Mei Buwe sin awer nit haglich“! So han ich jetz ach verstann, for was ich vill koche han selle. Sie han ach em Kuche gut zugsproch un gement, es Bradl were se erscht vor em Hemfahre esse.

Es Brigitte is ach e Temeschwarerin, es is in eener katholisch Kerch noch newetsbei Kantorin. Un alli vier Buwe han die Lieb zur Musich in die Wie geleet kriet. Jeder spillt e Inschtrument: Akkordeon, Blockflöte, Gitarre un elektronisch Orgel. Natierlich sin die Inschtrumente mitgebrung gin un mir han alli mitnaner musiziert.

Um acht Uhr han ich dann es Bradl ufgetraa. Des bissl, was iwrich geblieb is, han ich ingephackt un gedenkt: Morje were mer schun wieder was koche!